

- 1^r Wer sitzet vff des glückes rad
- 2^r Der ist ouch warten fall mit schad
- 3^r Vnd das er ettwann nãm eyn bad

Kap. 37



Von gluckes fall

- 1 Der ist eyn narr der stiget hoch
- 2 Do mitt man sãh syn schand vnd schmach
- 3 Vnd sũchet stãts eyn hõhern grad
- 4 Vnd gdencket nit an glückes rad

5 Eyn yedes ding wann es vffkunt
 6 Zûm hõchsten / felt es selbst zû grunt
 7 Keyn mensch so hoch hie kumen mag
 8 Der jm verheiß den mornden tag
 9 Oder das er morn glück soll han
 10 Dann Clotho loßt das rad nit stan /
 11 Oder den syn gût vnd gewalt
 12 Vorm tod eyne ougenblick behalt /
 13 Wer gwalt hatt der hat angst vnd nott
 14 Vil synt durch gwalt geschlagen dott /
 15 Den gwalt man nit langzyt behalt
 16 Den man muß schyrmen mitt gewalt
 17 Wo nit lieb ist vnd gunst der gmeyn
 18 Do ist vil sorg vnd wollust kleyn
 19 Der muß vil vörchten / der do wil
 20 Das jn ouch sõllen vörchten vil
 21 Nûn ist vorcht / gar eyne böser knecht
 22 Die leng mag sie nit hütten recht
 23 Wer hatt gewalt der selb der ler
 24 Lieb haben gott / vnd sûch syn ere
 25 Wer gerechtikeyt halt jn der hant
 26 Des gwalt mag haben gût bestant
 27 Der hatt syn gwalt wol angeleyt
 28 Vmb des abgang man truren treit
 29 We dem regyerer noch des dot
 30 Man sprechen muß gelobt sy got
 31 Wer waltz eyne steyn vff jn die hõh
 32 Vff den falt er vnd dût jm we
 33 Vnd wer verloßt sich vff syn glück
 34 Der vellt offt jn eyme ougenblyck